

東窗集

五

東

百

集

五

詳校官庶吉士臣翁樹培

侍讀臣孫球覆勘

膳錄監生臣黃維

欽定四庫全書

東憲集卷十一

宋 張擴 撰

制六

呂希常除司農少卿總領淮東財賦制

勅具官某昔先王盛時國有九年之蓄旱乾水溢無不足之憂漢文景之世海內豐富太倉之粟幾致紅腐雖生財節用固自有術豈亦司稼之官得其人乎爾智惟疏通才任繁劇憲曹銓部俱以能稱其佐大農往調兵

食昔爾父嘗事先朝殆徧卿寺典故詳練為時老成詩
不云乎維其有之是以似之無墜家聲汝其勉哉

程克俊除端明殿學士簽書樞密院制

勅朕圖回大業責成二府之臣延登偉人參乘五兵之
柄惟兼資於文武乃協濟於事功冠予侍從之聯爰得
英髦之士載稽衆志誕錫明綸具官某學博而精器宏
而重議論得深切著明之體詞章推爾雅溫厚之風早
以才名揚於禁路柱史經幄西掖東垣凡由進用以來

皆極清華之選寢專玉堂之潤色遂副廊廟之東求式
資儒者之功以濟天下之務雖游夏高聖門之列文學
見稱而頗牧居禁籞之中訐謨已久進陟機庭之峻寵
兼祕殿之崇庸厚褒嘉益昭體貌噫武不可黷朕方善
休兵息民之圖安寔敗名爾宜贊保大定功之計必使
照臨所及悉懷道德之威其務同寅底於至治

安民靖難功臣太傅樞密使廣國公張俊曾祖

守明追封號國公制

勅朕講信修睦克敦大國之盟事親寧神昭格一人之
孝爰敷惠澤以綏萬方眷予西府之臣宜厚曾門之寵
具官故曾祖某行高里社志樂丘園榮名不顯於一時
餘慶遂綿於三世有孫甚顯秉國之樞宜荒號略之封
以稱祕章之渥尚幾精爽亦克歆承

曾祖母石氏贈鄧國夫人制

勅漏泉之澤方覃及於綿區顯親之章宜上休於三世
矧予近弼用錫湛恩具官故曾祖母某氏靜以無華溫

而有禮賓客推中饋之吉祭祀稱宜家之賢祚啟後人
進登廊廟盛筭珎之飾屢渙渥於恩綸易長樂之封益
增光於脂澤精爽如在尚克歆承

祖慶追封相國公制

勅配天其澤式恢至治之休自仁率親莫嚴尊祖之義
維時近弼就列在廷爰舉彝章以昭異數具官故祖某
行高州黨惠浹宗姻善既積而有餘名益彰而不朽施
於孫子蔚為忠蓋之臣秉我事樞宜錫哀榮之典進封

欽定四庫全書
卷十一
大國用渙湛恩尚惟營魂式克歆享

祖母田氏贈充國夫人制

勅天生傑才克正弼臣之位國有大賚用增王母之封
具官故祖母某氏淑慎飭躬慈祥睦族早有功於內助
遂貽慶於方來繫爾聞孫位予樞筦爰因霈澤之渥進
疏大國之封尚惟營魂式克歆享

父密追封魯國公制

勅源深則流派斯遠本固則枝葉必繁惟予本兵之官實

自嚴君之訓肆頒惠澤盡舉愍章具官故父某節義起家嚴明服衆于公之陰德甚厚宜大門閭孤突之教忠猶存有光祭祀繫爾令子實勤王家用荒魯國之封以厚幽局之寵尚惟未泯不顯其承

母謝氏贈魏國夫人制

勅曠蕩之澤式昭漏泉之恩鞠養之慈宜隆報本之禮矧予樞輔可後愍章具官故母某氏德範靜專禮容淑慎夙著家人之譽挺生男子之祥為時名臣有功社稷

肇頒脂澤已茂會稽之封畀以大名其更全魏之寵尚
惟精爽不昧其承

妻魏氏封鎮國夫人制

勅夫婦有相成之道茲本人倫室家申燕喜之私莫踰
國寵具官妻某氏柔嘉有禮恭順而慈潔蘋藻之羞克
承祭祀服箴圖之訓能肅閨門有嘉內助之賢宜受既
多之祉改封大國用侈新恩服我方來之榮益思長守
之戒

端明殿學士左朝奉郎簽書樞密院事程克俊
曾祖居吉贈太子少保制

勅惟程受氏于古有人嬰存趙孤伯率淮浦衛尉愴威
名於漢袁師著孝友於唐寥寥洎乎本朝奕奕振於江
表有儒者登二府之列譜系可尋推異恩及三世之親
典章惟舊具官故曾祖某早迪賢行雅高月評內懷忠
信之純外履中庸之正宜爾積善及於曾孫為時名臣
參我兵柄東宮亞保位峻秩尊昭示恩榮式光泉戶

曾祖母朱氏贈新興郡夫人制

勅朕惟右府之本兵實資人傑推曾門之賢配爰錫恩
章具官故曾祖母某氏勤儉起家慈祥睦族內謹箴圖
之戒外嚴賓客之羞慶溢後人位於近輔寵錫小君之
號肇新湯沐之封尚幾營魂歆此殊渥

曾祖母姚氏贈威寧郡夫人制

勅朕登用本兵之臣圖回共政之効嘉乃同德福自曾
門爰舉愍章式頒異數具官故曾祖母某氏惠和雍

肅備於一身孝順慈祥均於九族澤鍾餘慶祚啟後人
宜爾孫曾位予樞筦屬茲超拜之始庸後追榮之恩錫
號小君䟽封名郡時乃優寵式慰營魂

祖世顯贈太子少傅制

勅惟純臣能事君式昇機廷之重惟學士知尊祖爰推祿
典之隆具官故祖某孝悌修身中和植德義方訓以詩
禮有子則賢陰德大其門閭至孫而貴位列右府恩沾
私庭載陞宮傳之崇式厚泉扃之寵營魂未泯茂渥其

承

祖母贈縉雲郡夫人制

勅朕延登英傑參秉樞機位為大臣禮亦異數既厚私
門之寵宜推王母之恩具官故祖母某氏法度自循孝
慈有則仁以厚下而均宗族之惠禮以奉先而嚴祭祀
之羞慶溢後人位予近輔寵以小君之號肇啟縉雲之
封尚幾營魂歆此殊渥

祖母胡氏贈齊安郡夫人制

勅上詞同具官故祖母某氏慈惠靜專柔嘉淑慎壺則共

推其可仰家道固因而自肥慶溢後人位予近輔寵以小君之號肇啟齊安之封尚幾營魂歆此殊渥

祖母王氏贈昌元郡夫人制

勅上詞同具官故祖母某氏早以華宗嬪于厚德動必遵

於法禮行固宜于室家慶溢後人位予近輔寵以小君之號肇啟昌元之封尚幾營魂歆此殊渥

父達贈少師制